

Garesiyaahiyaapi Utipiho

Autaahaatiho Sawaho

Porihoai Namihanataise

Kimandi Garesiyaahiyaapi Utipimandapi Nesipihande

Garesiyaahandi sandi yapipatami ambipate. Iyataati sati yapita isihiya usa piwiha asiwa nehihaiwa isihiyai katiwunjawi daayawaayopo. Aihi Poriho utipiho kimo jipatipiyati nusoaasataise. Isihiya piwiha asiwa nehihaiwa katiwunjopo tohiyimiya siya piwiha satiwaha katiwunjauhito: 'Nyahi Jisaasihopi giwunyaahaawi Judaahiyaami satoyaami piwiha winihapipa jihapa biyaati japepihiritihaawe. Siyaati japepihirihaawaahi asitimatitahaahandi naitihaawe,' tiwiha katiwunjawaayopo. Siyauhahandi kandi Poriho kimo utipimo jipatipaisimoraahi siyati nunjataise. Nyahi Jisaasihopi biyaati giwunyaahaawaahi asitimataati nasisoaari bimitihaahandi nyahi naitihaawe undati nunjataise.

Garesiyaahiyaapi Piwiha Napimasataise

Poriho Awaisihomi ambipataahi ipihirete undisiha (1:1-5)

Piwiha asiwa nehaha katiwunjohiyihiyai Garesiyaahiya kiyaami piwiha nemapi atihomaawitiwindi napaapi atiwisopo tati katisiha (1:6–2:21)

Nyahi Autaahaatihoapihi asitimatitahaahandi nyami andititotihanda nawiho nunyaati namaito. Autaahaatihohi aimi nyasonataisi nyahi kopi biyaati giwunyaahaawaahi asitimatitahaahandi Ko nanyamitaise tisiha (3:1–4:31)

Kiraisiho anditinyaiwati watipinyamahonihini nyahi asiyaani bindihaawi kiyaaninihi Itipiho Gaahomi piwiha biyaati atiwitahaawe tisiha (5:1–6:10)

Poriho komi piwiha owemati isihiyai ipihirete undisiha (6:11-18)

1 Nini aposerihonini Porihonine. Kiraisiho ningi komi otipipati naninyati natanoasisihonine. Nini noaipati Kiraisihomi

aposerihonini otipipati kopi kawitandihoninimatotimandi^a nehi utaa ho wo ningi nanimihanati natanoaasihimahe. Owetise. Kimati otipimbati Kiraisi Jisaasihouni ami Autaahaatiho Apiho Kiraisihoai ahowimati japihi numwaasihouni nanimihi nini kindarami ikwiraatihapi netihate. Aihini nini sahi Kiraisihomi naisihiyaati yapipati Piropinjihandi Garesiyaahandaahiyaatapi utipimandi kimandi jipatiyayaayo. ²Aindi ninitihini ami nisi naisihiya nisataiwi Kiraisihopi giwunyaahohiyihiya kimbihini ningisawi bimohiyihiyaatihi, nyahi nahatiyaanini sahi Kiraisihopi giwunyaahohiyihiyaati yapipati piropinjihandi Garesiyaahanda bimohiyihiyaatangi gaahuraare satihaato.

³Nyami Apiho Autaahaatihouni ami nyami Awaisiho nyangi nyainjatisiho Jisasi Kiraisihouni sahi gaahapa wapa kamaiwi nehihandi sangi gaahati kasimi jatatamasaihi, sami maariho ambipati wisaitati usaasinati napaisaatitonihini bimitaatiwi nini Autaahaatihoai sapi nunjeniti gaapisundataayo. ⁴Nyahi wani maipihaiwa taawaati kiyohiwimaiwaatihapi nuwati japihi nanyamaitandi Kiraisiho nyami Apiho Autaahaatiho maaritati gwinyaasirihireti japepahirati, ko nyapi komi ambipati nunyanati yaawihandi netaise. Ami sandi ko kaimdimandi isihiya kimaapi yapipatambihiya apipaahi maipihandaatihi bimohitihandaatihapi nyangi nuwati nanyamaitandi kiyataise. ⁵Isi ami ko Autaahaatiho siyati kanyindimandapi Autaahaatihoai apipaahi gaahone gaare, undaati nahateweti jinjapihi mepi autahemwaitihaawo. Akite.

Autahaatihomi Piwiha Waniha Gaaha Nehi Naasaahihini Ahondaise Wa Owetise

⁶Sangi sahi gaahapa wapa kamaiwi nehihandi Kiraisiho gaahati kasindhandaahi komihiyaatimatitaatiwi Autaahaatiho gaatati nasamaasihoi sahi keti kuraanini namasi piwiha nehaha, ami ka piwiha waniha gaahaamataiwi atiwi nepi japepahirauhi ami nini sandapi yaaindimati, 'ese napitiyawaayopo,' ndi waati gwinyaataayo. ⁷Ami piwiha gaaha waniha wa ahimotise. Owetise. Sa piwa nehaha kasatauhi atisota akaahaamahe. Owetise. Nehiha jaipitahaare. Isihiya siya sami gwinyaahohitihandi nepi nasopisasawi Kiraisihomi piwiha gaaha waniha nepi wireti asiretemapi kasatawaatopo. ⁸Iyataati ami nyahi aimi piwiha gaaha waniha sangi kasato. Isi ami nyahi yawanaani otipipatihyaani kimaapi yapipatambihyaano, ami yamihapataatihapi Autahaatihomi otipipatiho woaisangi piwiha gaaha waniha nyahi sangi jihini kasatohihaamatimetihaha wani kasatohaawaahi ami nyahi

^a 1:1 aposerihonine tohitimandami tanyaaha otipipatapi Kiraisiho natanoaasisihonine ndaato.

aunahipati maipihata sisihaapihi nowa yaasahandi naito. ⁹Nini kimandi jiji aimi kandatihandi kandi ami jihaati kandaato. Utaaho wo piwiha gaaha waniha sahi jiji aimi atiwi nehotihaamatimetiha wipiyaha wani kasatisiho soai Autaahaatiho yaawihandi nunyati sisihaapihemaitaise.

¹⁰Isihiya nisapi maarititaatiwi nini piwiha sangisi ausaati kasatataamaayo. Owetise. Nini Autaahaatihoai neti maariho wiwisanihi ami ko maarititandi nini piwiha ausaataayo. O ami nini jhamataindi isihiya nisi piwiha atisawaawi nisapi kiya maarititaatiwi kiyai neti nusepepaipati atipati nunyati piwiha kaundataataahi, ami sandi nini Kiraisihomi akiti otipipatihoninimahe.

**Kima Piwima Poriho Noaipati Otipipatapi Na
tausaasisihoematindihandapihaare**

¹¹Nisi naisihiyaati nisataiwi Kiraisihopi giwunyaahohiyihiyaate, nini sangi titihi sandi kasatataato. Nini piwiha gaaha waniha sangi aimi jiji kasatotiha sa piwiha nehi isihiyaamihamaahe. Owetise. ¹²Nini aimi jiji piwiha kasatotiha sa utaaho wo kandihaha kasatataamaato. Iyataati ami isihiya usa piwiha kaapi ningi katiwinisauhi nini netihaamaahe. Apipaahi owetise. Jisasi Kiraisiho sawaho titihi ningi nanisati kandihi netiha sangi kasatataato.

¹³Nini jihura Judaahiyaamihireti anditindi bitondaati nisi kiyohiwaiwaapi sahi aimi atiwi nepi gwinyaapihiyaate. Nini jihura isihiya Kiraisihopi giwunyaahohiyihiya nahatiyai neti tipitapaati toriwati nosasitihonine. ¹⁴Nini nyami asoya asisa Judaahiyaami kiyohiwaiwa anditititi neti gwinyaati kireti japepihiritihonine. Saindi nisaahoya naasuraahiya Judaahiyaisi nusatipahaati gwinyaati nini jihimandi japepihiritihonine. ¹⁵⁻¹⁶Iyataati ningisi naati sangi nanimwihihura Autaahaatiho komi otipipatapi nanimahanahonine, isihiya Judaahiyaami Dawaapihiyai komi mwaahopiha piwiha gaaha waniha awusaati kaunditando. Isi nini gaahapa wapa kamaindi nehihandi ningisi Autaahaatiho gaahati kanisati komi otipipatapi gaatati nanimaataise. Nanimaati komi mwaaho Kiraisihoai neti ningisi nanisataise. Autaahaatiho siyati ningisi kanihi nini nundi isihiyai Autaahaatihomi piwihaapi nunjeniti netaamaayo. ¹⁷Aihi ami nini aunahipati awaipati Jerusaremihanda isihiya nisi jiji noaipapi otipipatapi natausaasisawihiyaimatiwi bimohiyihiyenda nini windi keti namaayo, otipipati kawitandi Autaahaatiho nanimipatapi kaunditando. Owetise. Nini apaipi yapipati Arepiyaahandaahapi notaayo. Nundi bimambiti ipotihura aunahipati Damasikaasihandaahapi notaayo. ¹⁸Siyati Autaahaatiho komi mwaahoi neti nanisihimonihi kinaungwiha mairima sanaihihura Pitaahoi iwinjaitandi Jerusaremihandaahapi niyataayo. Naindi ami windi utaari bimimo owetise. Nehi asisihia 15

kiyahanyeti koaisati maasi bindataayo. ¹⁹Nini saindi Pitaahoaisati bindataati otipipatapi natausaasisawihya usaisi windi mausoho. Owetise. Nehi Jemisiho nyami Awaisihomi saingihohaisaahihi iwinjataayo.

²⁰Piwiha kima nini sangi kasatiti jipatipiyohima Autaahaatihomi ndiheti apipaahi akitinihi akaaha kasatiti jipatipiyataayo.

²¹Saindi Pitaahoaisati maasi bimambiti yapipati Siriyaahandaahapuni ami Sirisiyaahandaahapuni nundi kaurami otihatihni daayataayo. ²²Saindi daayonihi Kiraisihopi giwunyaahohiyihya yapipati Piropinjihandi Judiyaahanda bimohiyihya nisi ndimaahomwaaŋi windi maanisonihopo.

²³Maanisoniwi nehi piwihaahi atisawaawi satawaatopo. “Jihura piwiha akaaha Akitiha ausaahauhi nyahi ka piwiha akaahe taati gwinyaaahonihi kaapinyatati nyawati nanyopisasisiho ko ami piwiha ka naasika taati ausaati isihiyai kaundataase,” tawaatopo. ²⁴Satiwi katiwi nisi kiyohitihandapi Autaahaatihohai gaahone, undiwi koai mepi autaahepum awaayopo.

**Kiraisiho Komi Otipipatapi Natausaasisawihya Aposerihiya
Porihohaisawi Komi Otipipatapi Kiyaami Maariho Naasohindaise**

2 ¹Saindi Kiraisihopi giwunyaati komi otipipati kaindi bimonihi kinaungwiha ikwimaindimwitihi auhirami isundipihomaurimauri sanaihi ami ninitihni Banapaasihotihni aunahipati awaipati Jerusaremihandaahapi japihi niyahaayo. Siyaha niyahaawi nini Taitaasihoai numwaasi maasi niyahaayo. ²Ami sandi Autaahaatihonihi ningi, Jerusaremihandaahapi naime, ndati neti nanisati kandihni niyataayo. Naindi Jerusaremihanda bindataati Autaahaatihomi isihya Kiraisihopi giwunyaahohiyihyaami awaisawihya mitihyaisaahihi usoniti piwaundataato. Piwaundataati Piwiha Gaaha sandiha ausaati isihya Judaahiyaami dawaapipihiyai ausaati kaundataato, unditi titihni kaundataayo. Nini saindi kiyohitimandi nisi piwiha jihni kaundotihauhi ami wani kaundotihauhi noti nehihaimatati windi owemetitonde.

³Iyataati ami Taitaasiho nini numwaasi niyotihni so isihya Judaahiyaami dawaapipihyaamihondaahandi kandi komi ambipati ahoaapi namandipapise, ko noaipati Autaahaatihomihomatitandotiwihi kiya aposerihiya ningi windi kamandopo. ⁴O ami isihya usa jaipitiwi naisihyaane, tiwihiya nuwi napiwaiwi daitati kaiwi nyahi ahoyana piwaatopihni niyawaayopo, nyahi Kiraisihopi giwunyaawaati ami koaisaati timaamaitohiyihyaanangi Kiraisiho winihapipa nyangi neti nyainjatitandihandaatihapi nanyamaati neti ipaahaapi nehihyaanenyamati ahinyindihandapi sanyatiwi, saiwa sahi asiretiyopo, nyatiwi japihi Judaahiyaami winihapipaami otipipatihyaanepinyamapi ami sanyatiwi winihapipa sahi japepihiriwi kaiwise, ami sahi Autaahaatihomihyaatititaatiwo nyatitaatiwunyaapo.

⁵Satiwi kanyatauhihandi kandi nyahi kiyai windi atihomaawiso. Sandi nyahi siyotimandi Autaahaatihomi piwiha gaaha asireti namoaipati titihi nyami ausaahohirihireti ahotimi niyonihi sahi titihi atitaatiwe.

⁶Iyataati isihiya awaisawihiya Autaahaatihomi isihiya Kiraisihopi giwunyaahohiyihiyai iwinjaawi jihimatiwi bimohiyihiya nisi piwiha ausaahotiha nepi bipinjawi ami kaami tiwatihaati wa wipetaha windi kamaatopo. Autaahaatiho nehi sawahohi saiwi awaisawihiyaimatohiyihiyapi siya awaisawihiyeye tati usonati gimunyaahore. ⁷Kaundonihi kiya wa wipetaha bipinjawi kamandiwi otipipati nisi kiyohipati mmonawa, Autaahaatiho Pitaahoai otipipati piwiha gaaha Judaahiyai ausaati kaunditandi numwipatamatiyati Porihoai nunyataise, isihiya Judaahiyaami dawaapipihiyai piwiha gaaha ausaati kaunditando, tiwi gwinyaawaayopo. ⁸Autaahaatiho Pitaahoai watipihandi nunyati natausaasataise, Judaahiyai piwiha gaaha waniha ausaati kaunditando. Ami nisangi naasikati kiyati Autaahaatiho watipihandi naninyati natanoasataise, isihiya Judaahiyaami dawaataati bimohiyihiyai piwiha gaaha waniha ausaati kaunditando. ⁹Iyataati ami Jemisihohi, Pitaaho ami Joniho isihiya Kiraisihopi giwunyaahohiyihiyai mitihiya jihiyaimatiwi iwinjatohiyihiya Autaahaatiho ningi watipihandi nanimindihandi mmonawaayopo. Saiwi mmonawaawi Autaahaatiho ningi gaahati kanisati otipipati kimati nanimihi ami kiya ningisuni ami Banapaasihohisuni otipipati maasi ninawipihiki kiyohururiso, tiwi nga nyasopi nanyamaawaayopo. Nanyamaahauhi nahatiyaani maariho naasohi gwinyaawaati sataati kanahaato. Banapaasihouni ami ninuni piwiha gaaha waniha nesi isihiya nehi kiyai usa nyahi Judaahiyaanami dawaapipihiki bimohiyihiyai ausaaha kaundisaihi ami sahi sawanaati kimbihiki Judaahiyai ausaapi piwiha gaaha waniha kaundiwise, nnaati kataati piwiha wisasihaayo. ¹⁰Aihi kiya piwiha wa nehi naasaahi kanyataawaatopo. Isihiya Kiraisihopi giwunyaahohiyihiya kahapaamapipa ikipipa owehiya kimbihiki Jerusaremihanda bimohiyihiyai wapa anditiwiwitandihapa numwitihaahapaapi gwinyaapi kaimise nyataawaatopo. Sati kiyaami kanyatohipiti otipipati kaitandi jihura nini maarititihatisi kati nini anditindi kiyataayo.

Poriho Andiyokihanda Pitaahoai Itihundataase

¹¹Aihi ipotihura nini nundi aunahipati awaipati Andiyokihanda bimonihiki Pitaaho nasati ninjasihiki isihiyaami ndiheti auta itihundataayo. Sandi itihundotimandi apaapimaaha, ko siyati windi asireti kaihe.

¹²Jemisihouni ami isihiya usa Judaahiya Kiraisihopi giwunyaahohiyihiya sangi nasauhura Pitaaho isihiya Judaahiyaami dawaapipihiki bimohiyihiya Kiraisihopi giwunyaahohiyihiyaisati maasi bindata piwaundati nandapa nanataise. Maasi bimainjati Jemisihohi naisawihiya

nasauhi kiyai ko iwinjatosati maasi bimisawihiyai namasi koai yandihii wapihi nawisati noti nehi Judaahiyaisataahihi bindataise. Ko siyati sandi kaindimandi Judaahiya ami isihya kiyaami dawaapipihiyaisawi maasi timaamaamaitiwi nehi kiyai yiyandihii bimaawihiyaasi kandapi kiya ninjaitaawo, tati gwinyaataate. ¹³ Aihii ami isihya usa Judaahiya Kiraisihopi giwunyaahohiyihya Andiyokihanda bimohiyihiyaisangi Pitaaho kaipatamataiwi kiyawaayopo. Saiwi kiya Banapaasihoaisangi nepi nusepepaipihauhi ami koaisangi kati kiyati Judaahiyaanami dawaapipihiyaisati windi maasi bimimise, ko noti yandihii Judaahiyaisati bindataise. ¹⁴ Saiwi kiyauhi nini usonataati, Autaahaatihomi piwiha gaaha waniha titihi akaaha katirihireti kamaiwi asiretiyowo ndi, isihya Kiraisihopi giwunyaahohiyihya nahatiya bimauhi kiyaami ndiheti Pitaahoai saundataayo. 'Kinyi Judaahonje. Kinyi saimbi Judaahonjitaapaahandi kandi Judaahiyaami ipaahaapi dawaapipihya kiyohirihireti kaimbi bimambipihonje. Kinyi saimbipihonjisi, ami wani kinyi nepemaitipi Judaahiyaami dawaapipihya Mosesihomi winihapipa japepihiritaatiwi kinyi napindapi watipitimahise, unditi itihundataayo.'

Utaaho Kiraisihopi Giwunyaasiho Sohii Titihore

¹⁵ Iyataati akite, nyahi Judaahiyaamihetapi namoyaataahiyaanine, isihya Judaahiyaami dawaataati bimohiyihya maipihaiwa kaiwihyaamihetapi namoyaataahiyaaninimahe. Owetise. ¹⁶ Sahi baiwi gwinyaapise, utaaho wo Mosesihomi winihapipa napaitati japepihironihi kandapi kopi Autaahaatiho satati, gaaho titihoe, tati windi mausondaise. Owetitaise. O ami utaaho nehi Kiraisihopi biyati nga giwunyaasihoaisaahihi, ko titihoe, tati Autaahaatiho usondaise. Isi ami nyangisangi Kiraisihopi giwunyaahohitihandaahi Autaahaatiho titihyaate, nyatitaise. O ami winihapipa napaitaati japepihirotihandaahi titihyaate maanyatitaise. Owetitaise. Sandi apaapimaahe, utaaho wo ko sawahomi watipihanda anditititi winihapipa nga biyati nahataapa windi minjapepihiritaise, ami Autaahaatiho koai, kinyi titihonje unditando. Apipaahi owetitaise. ¹⁷ Nyahi Kiraisihopi giwunyaahotihandaahi koaisaati timaamaitaati ami nyahi noaipawaati Autaahaatihomi ndiheti titihihyaanimatihaawaahi nyahi Judaahiyaanisangi maipihaiwa kiyaahiyaanine taati gwinyaito, isihya nyami dawaapipihya maipihaiwa kaiwihyaamatiyaato. Isi nyahi Kiraisihopi sataati, maipihaiwa waati noaipaitandi anditiwiwitaise, taati gwinyaitihaawo? Owe. Nyahi windi sataati kamaatitahaawo. ¹⁸ Iyataati ami nini winihapipa japepihirotihandi aimi namatatihandi kandi nini japihi kaiwa neti kaindunjati ami anditindi winihapipa japepihirataataahi ami sandihii nini titihimetahandi kaito. ¹⁹ Winihapipa ningi ninjatindihandaatihapi nini aimi napomataahonisamatendaayo. Iyonihii winihapipa ningi windi

wani maaninjatise. Aihi winihapipa katirihireti kireti japepihirati Kiraisiho nisi aunahipati neti nisi maipihandapi napwihi ami nisangi Kiraisihoaisati ipi titihi atawihateti nimaatiti napoti, ami noaipati Autaahaatihomihoninimatataayo, ami nini nehi komihapaapaahaitando. ²⁰Nini wani wanihireti daindi kaindi bimohitimandi nini niwahonisi saindi saindi daindi kaindi bimitaano, ndi gwinyaahohirihireti daindi bitondaamaayo. Owetise. Kiraisiho nisi omanjititihini nasati bindataati saimbi saimbi kaimbi ami daimbi bitose, ndati neti wanihireti ginunyaasihini ami nini wanihireti kaindi daindi bitondaayo. Wani kimura wanihireti kaindi bimohiwimaiwa saiwa Autaahaatihomi Mwaaho komi maariho ningisi naninyataati nisapi nisi maipihaiwaapi napwisihopi nini giwunyaataati saiwa nini kaindi daindi bitondaayo. ²¹Autaahaatiho ningi gaahati kanisati ami japihi nanimaasitihandi nehihande ndi nini windi nemaamaito. Iyataati winihapipa japepihirotihandaahi Autaahaatihomi ndiheti nyahi noaipawaati titihihyaanimatihaawaahi ami Kiraisiho nehihandi napwitaihe.

**Nyahi Winihapipa Japepihiritihaawo E
Kiraisihopaahihini Giwunyaitihaawo?**

3 ¹Garesiyaahiyaate, sami amitiha napa neti nasopisasihini ami sangi windi namaasesipatati naharimainje? Sangi ndi piwiha asa asireti kasatihe? Kiraisiho ipi titihi atawihateti napwindihandapiha piwiha titihi baindi nasesipati aimi nini sangi kasato. ²Sahi piwima kimaapi katiwise. Sahi Mosesihomi winihapipa baiwi japepihirotihandaahi Autaahaatihomi Itipihho Gaaho newaayowo, e piwiha gaaha Kiraisiho kaiwaiwaapiha atiwi akaahe, tiwi gwinyaahotihandaahi Itipihho newaayowo? ³Sami amitiha aimi nasosasinataiso? Sahi sami dahopa wanihapa Autaahaatihomi Itipihho Gaahoraahi namasawi kaiwi noaipapihiyaate. Saiwi Autaahaatihomi Itipihoraahi sahi sami dahopa wanihapa ami bimohitihandi wanihandi namasawi noaipaposawi, ami sahi japihi nepemaitiwi sawanaati nehi isihyaatami watipihanda dahopa daiwi owemaitaatiwo? Ami sandihini titihimahe. ⁴Samiheti wiwa nasoapasihini aimi mmoniwi gwinyaahohiwiwa nehihaiwa nasoapatati noti owetitando? Saiwa samiheti nasoapasiwiwa nehi nasoapataamaise. ⁵Autaahaatiho komi Itipihho Gaaho nasanyati komi watipihaiwa sami otihapihi kaiwimaiwa sahi Mosesihomi winihapipa baiwi napaitiwi japepihirotihandapi Autaahaatiho jasonataati kiyataiso, e sahi piwiha gaaha waniha atiwi nepi gwinyaahauhi kandapi komi watipihaiwa kaiso?

⁶Iyataati ami Autaahaatihomi piwiha jihaatihini Abiraahamiho kaindihandapi satati ahotise. “Abiraahamiho Autaahaatihopi giwunyaasihini Autaahaatiho koai usonataati kinyi titihone undataase,” tati ahotise. ⁷Isi sahi sandapi gwinyaapise. Isihiya piwiha gaaha waniha

Kiraisiho kaiwaiwaapiha piwihaapi giwunyaahotihandaahi kiya noaipapi Abiraahamihomi mwaaya maatiya saisatoyaimatawaayopo. ⁸ Iyataati isihiya Judaahiyaami dawaapipihim bimohiyihiyai piwiha gaaha waniha atiwi nepi kaapi giwunyaahohiyihiyai Autaahaatiho sahi titihyaate, unditandihandapi Autaahaatiho aimi jihura mmonati gwinyaase. Iyataati jhi aimihura Autaahaatiho piwiha gaaha waniha Abiraahamihoi kaundisiha satati jipatipindise. “Kinyi nisapi ginunyaahingitihandaahi nini isihiya nahatiyai gaahati kawito,” tati katisiha jipatipindise. ⁹ Abiraahamihomi Autaahaatihopi nga giwunyaasihim Autaahaatiho koai gaahati kawipatamatiyati ami nyangisangi giwunyaahohiyihiyaanangi naasikati kiyati gaahati kanyitaise.

¹⁰ Iyataati isihiya satiwi, nyahi winihapipa japepihiritihaawi gaare, tiwi japepihirohiyihiyai Autaahaatiho neti nopisasonihim kiya nepi nopisasindaapo. Ami sandi nini apaapimaato, Autaahaatihomim piwiha jihaatihi piwiha wa satati jipatipindise. “Utaaho wo winihapipa Autaahaatiho Judaahiyai numwimbipaami piwiha nahata windi biyati minjapepihirataataahi koai Autaahaatiho neti nopisasati mimai piwisamaitaise,” tati jipatipindise. ¹¹ Utaaho wo ko winihapipa japepihirindihandaahi ko noaipati Autaahaatihomim ndiheti titihometitaise. Sandi apaapimaato, ami Autaahaatihomim piwiha jihaatihi piwiha wa satati jipatipindise. “Utaaho wo Autaahaatihopi nga giwunyaasihom soaisaahihim Autaahaatiho saundati “kinyi titihom,” undonihohihim asitimaitandihandi neti nasisoaari bimitaise,” tati jipatipindise. ¹² Winihapipa japepihirotihandi sandi giwunyaahohitihandimaahom. Owetise. O ami sandi apaapimaato, Autaahaatihomim piwiha jihaatihi satati jipatipindihito. “Utaaso winihapipa nahataapa biyati japepihirati kapa katimbipa kaiso so biyati nga bimitaise,” tati jipatipindihito. ¹³ Ami winihapipaami sandaase. “Isihiya nahatiya winihapipaami piwiha nahata windi nga minjapepihirohiyihiyai nepi nopisasinihim napopise,” ndaase. Satati katihihandi kandi ami Autaahaatihomim piwiha jihaatihi piwiha wa satati jipatipindise “Isihiya ipi titihim atawihateti tipimandaapi tiwauhi nimaatohiyihiyai apipaami daahi nepi nopisasinihim napwitaatiwihiyem, tati Autaahaatiho usonataise,” tati jipatipindise. Aihim ami nyapi winihapipaami piwiha satisihim Kiraisihom nyamihetapi nemati, ami ko nyamim aunahipati neti nyangim japihim nanyamaitandi winihapipaami piwihim neti akaahemati gaamati neti nopisasinati napotaise. Iyati ko ambipati satati, “Utaaho Autaahaatiho neti nopisasihim neti nopisasinjihom,” tati hatihim netaise. ¹⁴ Autaahaatiho jihura Abiraahamihomim isihiya ipoti ipotihiyai gaahati kawitandi piwiha timanati watipitati wisasindihandi, ami wani Kiraisihoetapi isihiya Judaahiyaami dawaapipihiyai gaahati kawisataise. Aihim ami Kiraisihom napotaise, ami nyahi kopi giwunyaahohitihanda Itipihom Gaahom Autaahaatiho nyangim nanyamitandi katisihom nanyinyonihim nyahi naitihaawom.

**Autaahaatihomi Winihapipa Autaahaatiho Wapa Kanyitandi
Jihi Timanati Katimbipai Windi Nemaamaitaise**

¹⁵Nisi naisihiyaati nisataiwi Kiraisihopi giwunyaahohiyihyaate, nyahi isihyaanini yawanaanini nahateweti kiyohirihiretapi namihandi nini sandi katitandiyo. Ami utaahuri wuri yahuri wapa kaitaatimi piwiha kanimi wisasisiha wo neti nopisasatuni ami piwiha kaasini bihiwainjati wa ahimaitaise. ¹⁶Autaahaatiho Abiraahamihopuni komi satihopuni piwiha watipitati kandaase. Iyataati komi piwiha jhaatihi utipihoaatihapi, “kinyi gaasoya gaasisa,” tati taahiyihyaapi windi katati ahondaamaise. Owetise. Nehi titihi naasopi, “gaasiho,” ndaase. Iyataati so, “gaasiho,” tiso so Kiraisihopise. ¹⁷Kima piwima katohimaami tanyaaha siyate: Jihura Autaahaatiho Abiraahamihaoisati piwiha watipitati wisasati ahiyataise. Iyati piwiha wisasisihaami akipipa titihi kaito ndaase. Aihi kinaungwiha taahiwaiwa 430 kiyati aimi sanaihihura ipoti winihapipa Autaahaatiho Mosesihoetapi Judaahiyai numwimbipa noaipataise. Isi Autaahaatiho piwiha watipitati katati wisasati ahaisihai winihapipa windi nemaamaitaise. Owetitaise. ¹⁸O ami nyangi winihapipa Abiraahamihomi gaahandi Autaahaatiho kawindihandi nyangi winihapipa nga nanyinyonaahi, ami Autaahaatiho Abiraahamihoi gaahandi kawitandi piwiha watipitati katindihandi noaipati nehi piwihaatitaihe. Ami sandi windi siyatimaahae. Apipaahi owe. Ami Autaahaatiho Abiraahamihoi gaahati kawitandi piwiha watipitati wisasirihireti Komi gaahati kawisati nunyataise. ¹⁹Autaahaatiho winihapipa saiwa napaapi Isiraherihiyai numwisono. Autaahaatiho Isiraherihiyai winihapipa nunyataise, ami titihapa ami titihimetihapa neti kiyai nunjitando. Abiraahamihoi metiho wo Autaahaatiho numwitandi katisiho nasonihuraatitandi nehi jihi sura ko sangi napisuraahihi winihapipa ahotimi nasati ko napihihurandaise. Iyataati sapa Judaahiyaami winihapimba jihura Autaahaatiho komi otipipatihya yamihapataatihi bimohiyihiyai nunyataise. Numwihi kiya nepawi Autaahaatihomuni isihyaamuni otihapihapiho Mosesihoai nunyawaayopo. Iyauhi ami Mosesiho netati komi isihya Isiraherihiyai nunyataise. ²⁰Autaahaatiho piwiha watipitati wisasisiha utaaho wo otihapihapihoetapi Abiraahamihoi kaundati namumwise. Ami Piwiha wisasohirihireti yahuri wisasamaise. Iyataahandi kandi ami Autaahaatiho sawahounyaati piwiha watipitati wisasati Abiraahamihoi kaundirihireti windi siyati namoaipase, ami Autaahaatiho nehi sawaho naasohihi kiyataato.

**Winihapipa Nyainjatataati Saiwi Saiwi Kaiwise Nyatati
Nanyamaasi Kiraisihoapihinyamaitandihapahaare**

²¹Winihapipa saiwa Autaahaatiho Isiraherihiyai numwimbipa nepemaitati Autaahaatiho satati, isihya Kiraisihopi

giwunyaahohiyihya asiyihiyaimatiwi bimitaapo, tati Abiraahamihoi kaundati piwiha watipitati wisasati ahaisihaisi kwitiwati ipihatisamaitaiso? Apipaahi owetitaise. Iyataati ami winihapipa wipiyahapa ahotanihi kapa isihya japepihirawaawi asiyihiyaimatiwi nasisoari bimitaatiwihandi naitaatiwihapa ahotanaahi kapa kiya napaitiwi japepihirisaihi Autaahaatiho, sahi maipihyaatisi piwiha samiheti nutande, munditaihe. ²² Siyatititihati kati owe. Autaahaatihomi piwiha jiha jahihaatihapi satise, “Isihya nahatiya maipihandaatiji aimi napwitiwi bindawaayopo,” tati katise. Iyataati ami wapa gaahapa nanyamitandi Autaahaatiho jihi timanati katimbipa nyahi naitihaahira nehi naasairaahihe. Iyataati sira nyahi Kiraisihopi giwunyaitihaawe. Siraapi Autaahaatiho Abiraahamihoi gaahapa wapa kawisati numwitandi timanati piwiha katati wisasimbipa nyahi naitihaawo.

²³ Jihura Autaahaatiho piwiha watipitati katati wisasisiha noaipaitandi jatohura winihapipa Autaahaatiho Isiraherihiyai numwimbipa nyangi nyainjatihi bindihaayo. Sandi winihapipa neti siyati nanyapusih napwitaati katihi bindihaayo, ami Autaahaatiho Piwiha watipitati katisiha noaipahonihuraatititendo. ²⁴ Siyati winihapipa nyainjatimi noti Kiraisiho nasonihuraatitande. Kapa nyangi siyati nyainjatataise, ami nyahi Kiraisihopi giwunyaasaihi kandaahi Autaahaatiho nyangi neti sawahoaisati titihihyaanenyamaitando. ²⁵ O wanihi nyahi Kiraisihopi giwunyaitihaahira noipasihimi ami nyahi kopi giwunyaahonihimi nyangi jihi winihapipa nyainjatindihandi aimi kandinihi owetamase.

Nyahi Kiraisihopi Giwunyaahotihandaahi Autaahaatihomi Mwaayaanini Maatiyaanimatihaayo

²⁶ Isi ami sahi Kiraisihopi giwunyaahotihandaahi sahi aimi noaipapi Autaahaatihomi mwaayaati maatiyaatimatawaayopo. ²⁷ Sahi waapoho nehotindaahi ami sahi Kiraisihoaisawi aimi timaamaitauhi ami Autaahaatiho sangi neti Kiraisihomatetahiy aatesamataise. ²⁸ Nyahi Autaahaatihomihyaanini so Judaahoe, so Judaahiyaami dawaataatapihoe, so otipipati nawiho namehati kaisihoe, so otipipati usaami kamaawisa nehihoe, ami so wohoe, saati apopaate, taati usona katitihahandi owe, ami nyahi Kiraisihoaisaati timaamaitotihandaahi noaipawaati naisihyaanimatihaayo. ²⁹ Sahi noaipapi Kiraisihomihyaatimatawaawaahi sandihimi sahi aimi noaipapi Abiraahamihomisangi mwaayaati maatiyaatimatawaayopo. Isi jihura Autaahaatiho Abiraahamihoi kinyihiyai asiyihiyaimatiwi nasisoari kiyaanihi bimitaatiwihandi numwito, tati piwiha watipitati katati ahaindihandi ami sahi naitaapo.

**Nyahi Otipipati Nawiho Namewaati Kiyaati Nehi
Otipipatihatiamaatiyaahiyaani Kiraisiho Nyapi
Otipipati Kaindihandaahi Noaipawa Autaahaatihomi
Mwaayaani Maatiyaanimatihaayo**

4 ¹Nini sangisi piwiha sandiha kasatitandiyo. Metiho wo sapiho kopihapa yapipati ami ikipipa ami wapa wapa ko metopi ipoti gwinyanati awaisihondaahura neti jatati isiwatitandi ko metihotisura womi ikwiraatihi ahondaise. Aihi ko metopi sapiho nurimihainjipipauni ami ko metouni komihapa gohi iwinjatisihomi piwiha atiwisati komi asimwaatitihini bindataise. Ami wo utaaho noaipati awaisiho womi neti otipipatihoematihi komi awaisiho iwinjatipatamatiyati. ²Metiho siyati komi iwinjatisihomi piwiha atiwisati bimaami naihi usa komihapa iwinjatimi nuwi sapiho metiho sawaho komihapa nenetisuraatanihi ami metiho kapa neti jatati nanati kaitaise. Ami ko meto aimi gwinyanati awaisihondaataahi usa koaisi jahira maawinjatitaapo. Owetitaise. ³Ami sikiyaati nyangisangi metihonyaamatiyaati bimainjaahiyaanine. Iyataati itipihoni watipihaiwa watipihandisahaiwa yapipataapihuni ami tuwipataatihuni jatiwaiwaami winihapipaatihi bimainjaahiyaanine. ⁴Nyahi siyaati bimaami niyonihini ami asisiha Autaahaatiho jihi timanati namihainjiha ka titihini noaipasihini kura sawahoapipahi komi Mwaahoai maapi yapimbataapihi Autaahaatiho neti natausaasataise. Aihi itapaati apopa ko Autaahaatihomi Mwaahoai namotaise. Aihi ami ko nyahi isihyaanamatiyati Mosesihomi winihapipaami otitihini sanoti kapa japepilihataise. ⁵Ami nyahi winihapipaami otitihini bimohiyihyaanangi komi ambipati nunyati nuwati nanyamaitando. Ami ko siyati nyangisi nuwati nanyamaati watipihandi wandiha nanyinyonihini ami nyahi noaipawaati Autaahaatihomi mwaayaanini maatiyaanimatihaawo.

⁶Iyataati ami nyahi aimi noaipawaati Autaahaatihomi mwaayaanini maatiyaanimatihaayo. Iyonihini ami Autaahaatiho komi Itipihoni nyangisenda natausaasihini ko nasati nyami omanjititihini bindataise. Siyati Itipihoni bindataati nyangisi neti ginyunyaasihini nyahi sataati, “Apa apore. Nisi apo,” taati Autaahaatihopini gaatihaayo. ⁷Aihi ami nyahi siyaati noaipawaati Autaahaatihomi mwaayaani maatiyaanimatihaayo. Aihi ami sahi jahira noaipapi nehi otipipatihyaatimataawaamaayopo. Owetise. Sahi nehi ninaasonjini ami ninaasaanjini Autaahaatihomi mwaayaati maatiyaate. Isi ami sahi ninaasonjini ninaasaanjini Autaahaatiho sangi nasamitandi nasamihanati ahisimbipa kapa titihini naitaapo.

Porihoni Garesiyaahiyaapi Pihitani Nitanati Gwinyaataise

⁸Jihura sahi Autaahaatiho akohopini windi moniwini nanipimatiwini gimawunyaapihyaate. Aiwi sahi nehi itipihoni maapi yapimbatambi

nehihapa autaaahaatiho akohometahomihapaami asimwaatitih
 bimambiwihiyaate. ⁹Sahi saimbiwihiyaatitawaahandi kandi wanihi
 sahi Autaaahaatiho akohopi mmoniwi gisunyaatataise. Ami nehi
 sahi sawanaati andititwi daahohitihanda Autaaahaatihoai sahi
 usonawaamaayopo. Owe. Nehi Autaaahaatiho sawaho sangisaapihi
 ausaimaninataise. Isi ami sahi japihi nepemaitiwi nehi maapi nosasinati
 napaimbipa sangisi windi neti gaahapa nasanyati anditimaasiwihapaami
 nehi otipipatihatimaatititaatiwi nga maaritawaayowo? ¹⁰Sahi jihura
 saiwa kiyohiwaiwa Judaahiyaanamami winihapipa nehi nyami maapi daaya
 bimohirihiretapi saiwi saiwi kaiwise nyatirihireti baiwi japepihiriwi
 Asisiha Sapaatihandi mmoniwi, ami waatiho asoho noaipasura
 ahoyaniwi mmoniwi, ami kimbapiho wiwa awaiwaiwaapuni, ami
 kinaungwihaapi nandapa awaimbipa tihwi nanihohiwaio.

¹¹Nini sapi nisi maariho nindati naanganisataise. Nisi otipipati
 sapi nini kiyohipati nehihandi kiyono ndo. ¹²Nisi naisihiyaati
 nisataiwi Kiraisihopi giwunyaahohiyihyaate. Nini watipindi
 sangisi nasisenataayo. Ami samihatih nini sangisati bindataati
 Judaahiyaanamami winihapipa japepihiriti kapaami otipipati windi
 nini kamaayonihi sahi ninjahotihandisi ami kireti nisataiwi kaiwise.
 Nini Judaahiyaami winihapipa namasi samataindi noaipahonihi
 ami kandapi sahi maariwi ningi nitatamanawaayopo. Isi wani nini
 Kiraisihomihireti japepihirataayoni ami sangisangi ningi nanipinjawi
 nisataiwi kireti japepihiriwise. ¹³Sahi ningisi jihura jihapihandi
 wuwaninihi nisohotihandapi gwinyaapihiyaate. Nini jihura timbipa
 neti sangisati maasi bindataati Autaaahaatihomi Piwiha Gaaha waniha
 Kiraisihopitaha ausaati sangi kasatataato. ¹⁴Sura nini timbipa nehonihi
 sahi ningisi windi mmopinimapi pohipiniwi ahosimaanimapi gaahati
 kaniwi nitatamanawaayopo. Nini saindi bimonih ami sahi ningi
 Autaaahaatihomi otipipatiho yamihapataatihi bimisihoai numwaitataiwi
 nanimaapi ami Kiraisi Jisaasiho sawahoai numwaitataiwi nanimaapi
 nitatamanawaayopo. ¹⁵Nini saindi sangisi Autaaahaatihomi piwiha
 kasatonih piwiha kaaraahi sahi apipaahi aungwohandi maaritawaayopo.
 Jihura sahi saiwi maaritauhinjahoni ami wani sangi napitimatataise?
 O ami jihuraahi sahi nisapi maariwi ami wapa nini nenoahitohipipa
 nanimitaatiwi maariwihyaate. Ami nini akitinihi sahi sawanaatapi
 sandi gwinyaataayo, ami sahi ningisi wapa kanitaatiwi maaritotihanda
 ami sura sami ndihaisangi nga namwaapi ningi nanimitauhe, ndi
 gwinyaataayo. ¹⁶Ami wani sangi napitimatataise? Nini piwiha titih
 akiti akaaha kasatotimanda sami maariho neti nasopisasiti ami nini
 noaipati sami tiworihoninimatataayono?

¹⁷Sahi atiwise. Isihiya siya sangisi taawi atipati nasanyohiyihya
 sangi jatatamanitaatiwi gwinyaawaawimahe. Owetise. Sahi nehi

kiyaapi waati giwunyaapi iwitatamanitaatiwi sangi nasapopipi nepi kiyaamihioaangepisamaitaatiwi piwiha kasatiwi atipati nasanyawaayopo. Kiya sangi sasisahi sahi ningi nanimasi yandihematitaatiwo. Aiwi kiyaamihatihahi sahi nuwi nehi kiyaapaahaitaatiwo. ¹⁸Iyataati ami nini napiti sangisati bimaati ami nini sangisati windi bimimisanihisangi isihiya usa napiwi sangi jatatamanitaatiwi awaindihandi sapi maaritiwi kiya nyamihatihahi napito, tiwi jaiwaiwhaiwa kamaiwi kiyaami kiyohiwaiwa titihitahiya kiyawaawaahi ami sandihahi nge. ¹⁹Isi nisi metihonyaate, sapi nini gwinyapenataati nisi maariho jihaati yaasataise, apopaati maaha namwitandi yaawipatamatiyati ami sahi Kiraisihometirihireti noaipaitaatiwi gwinyaataato. Noaipapi akitinihi Autaahaatihomi metihonyaataatiwo. Aisaihi Kiraisiho samihatihahi nasati bimonihahi ami sahi Kiraisihomihatihahi bimitaatiwo. Binyaihi ningi maariho yaasindihandi owetitando. ²⁰Nini sangisati maasi bimitandi maaritataahandi kandi nini kaanihi bindataayo. O ami nini sangisati maasi deti bindataataahi sangisaapihi nasoaipasitimandami tanyaaha napitendaate, ndi baindi mmoniti titihemaitanihe. Isi nini sangisi napitaindi watipindi kasatitande.

Akaariyi Saraayaapi Piwiha Kima Namihanahaare

²¹Sahi Judaahiyaami winihapipa napaitiwi japepihiritaatiwi gwinyaapi maaritohiyihyaate, ningisi wani kandiwise? Winihapipa sandaase, tiwi mmoniwi gimunyaapihiyaato? ²²Piwa sa Autaahaatihomi piwiha jihaatihahi satati jipatipindisihaapito. Abiraahamihohi komi mwaahuri yahurisahore. Jihi noaipasiho so komi apwaataati akaamaatami nehi otipipatihaati neti wirasihi kaatamihetapi noaipasiho Isimairihore. O ami kapihi noaipasiho so Abiraahamihohi apwaataati windi nehi otipipatihaatimetisaamaatamiho Aisaakihore. ²³Iyataati Isimairiho so isihyaami nehi namwiyaatohirihireti japepihirati noaipahore. Ko siyati noaipasihi ami Aisaakihohi titihi Autaahaatiho watipitahi piwiha wisasati siyaho nahimisanihahi noaipaitaise, undati Abiraahamihohi kaundisiho ko noaipahore. ²⁴Iyataati ami sandi Abiraahamihohi mwaahuri nusoaipasitimandi ami wapa awaimbipa akiti noaipasirihiretapi namihana siwipati noaipataise. Iyataati ami apopipuri yapuri Akaariyi Saraaya piwiha watipitiwi katiwi wisasawi ahiyohihaamataimihapure. Kapuri saimihapurisi waati Autaahaatiho Mosesihoetapi Isiraherihiyai Sisiho Sainaihoasini winihapipa ikwimaindimwitihapa numwimbipaapi namihanataise. Iyataati saati Akaarihaate. Akaarihaati manyinya namwisawihya nehi otipipatihati mai namotaise. ²⁵Iyataati Akaarihaati saati Sisiho Sainaiho yapipati Arepiyaahanda ahetsihopi namihanataise. Iyati ami aunahipati awaipati wani ahetsipati Jerusaremihandapi namihanataise.

Iyataati sati aunahipi awaipiti katami yapipatami isihiyaisati ahoyati winihapipaami otitih nehi otipipatihatimaamatyahati wani ahendaise. ²⁶Ami Jerusaremihandi windi yamihapataatihapi Autaahaatihomihandi yahandi ahendaise. Iyataati kandi nehi otipipatihyaamatyahandimaache. Owetise. Sandi Autaahaatihomi yamihapataatihapi Jerusaremini nyahi Kiraisihopi giwunyaahohiyihiyaanini Autaahaatihomi manyinyaanami naatamatyahande. ²⁷Autahaatihomi utipihoaatihapi piwiha wa satise: “Ami kinyi apopaani aunihihiri katipi maarite. Kinyi apopaani yaatitipihangatapaapi maaha namohiyihiyai ambipati yaawih nehotohipatamataimbi namehotipihanga, kinyi kaahaatipi maaritipi ngwimwe. Ami sandi apaapimaato, apopaati waatami wariho konihi kaatisatitisaamaati nusatipihapi apopaani kiwiho nangimasi noaipasaamaani manyinya taahitihandi namoyaitaise,” tati piwiha Autahaatihomi piwihaami utipihohoaatihapi jipatipindise. ²⁸Iyataati ami nisi naisihyaati nisataiwi Kiraisihopi giwunyaahohiyihiyaate, sahi Aisaakihomataiwihyaate. Autahaatihohi gaahati Abiraahamihoi kawisati numwitandi piwiha jiji timanati katindihandi japepihirati Aisaakihohi noaipasipatamataiwi sahi noaipawaayopo. ²⁹Ami metiho isihyaami noaipahohirihiretapi noaipasiho metiho Autahaatihomi Itipihomi watipihanda noaipasihoai pohirundati yaawati naanjihandi nunyataise. Ami wanisangi kimikireti Kiraisihomi isihiyai taati nusoaipataise. ³⁰Iyataahandi kandi Autahaatihomi piwiha jihaami piwihaami utipihoaatihapi piwiha wa satati jipatipindise. “Apopaati nehi otipipatihati katami mwaahoaisapi natipusoase. Ami kaatami mwaaho apopaati nehi otipipatihati metisaamaatami mwaahoaisati maasi sapihomihapa windi namaitando,” tati jipatipindise. ³¹Isi ami nisi naisihyaati nisataiwi Kiraisihopi giwunyaahohiyihiyaate, nyahi apopaati nehi otipipatihati manyinyaaninimaache. Nyahi apopaati nehi otipipatihati metisaamaatami manyinyaanine.

**Nyangi Wapa Japihi Neti Namaanyapuwane Ami Kiraisiho
Aimi Nuwati Nehihaatenyamasihyaaniso**

5 ¹Kiraisiho nyangi aimi nuwati nanyamaati nehahaatenyamasihyaane, ami nyahi winihapipaami otitih windi napwitaati bimimitihaawo. Isi ami sahi andititiwi bitosawise. Aiwi ami sahi utaaho woai nehi iwinjasaihi sangi neti japihi winihapipaami nehi otipipatihati maatesamati naanjihandi neti wirati awitimaasisosane.

²Sahi baiwi sami atihiri mwitipisawi atiwise, nini Porihonini kimandi sangi kasatitandiyohitimandapo. Sahi nehi nanihaiwi iwinjasaihi isihya sami ambipati nepi asihoaapi nasamandipawaawaahi ami sangi jatatamanitandi Kiraisiho otipipati kaindihandi sangisi apipaahi nehi maipihonjisangi windi maasitamanitaise. Owetitaise. ³Sahi

Garesiyaahiyaati nahatiyaati sahi nehi iwinjasaihi kiya sami ambipati nasamandipahohiyihyaatangi nini waapihindi sandi kasatataato, sahi winihapipa nahataapa gaamapi japepihiriwise. Nehi sami ambipati nasamandipahohitihandihahi sahi minjapepihiriwise, kiretapi nyangi Autaahaatiho titihyaate nyatati nanyamaito tiwo. ⁴Sandihimmonawaayopo. Sahi saiwi ami satiwi, nyahi Mosesihomi winihapipa Judaahiyaamatiyaati japepihirisaihi ami kiretapi Autaahaatiho nyangi sanyatati, sahi nisi ndiheti titihyaate, nyatati nanyamaito tiwi gwinyaapi kiyawaawaahi ami sahi Kiraisihoaisawi timaamaitohitihandi aimi namahopo. Aiwi ami Autaahaatiho isihiyai kiya gaahandi windi kamaiwi nehihandi gaahandi kawindahandi sahi aimi namahopo. Kimandi sahi kiyohitimandaahi sahi sawanaati nepi yandihematawaayopo, Autaahaatiho sangi gaahandi kasitandihapipahi kaanihi yandiho. ⁵Ami nyahihitipiho Gaaho anditinyaisihiki Kiraisihopi watipitaati giwunyaawaati, ami Autaahaatiho nyangi sanyatati, “sahi nisi ndiheti titihyaate,” nyatati nanyamaati sawahoaisati neti nyamaamahiwitandi nyahi jatihaayo. ⁶Nyahi Kiraisihoaisaati timaamaitohiyihyaanini aimi mmonihaayo, isihiya kiyaami ambipati namandipatohitihanduni ami kiya kiyaami ambipati windi nahomaamandipatohitihanduni wapa awaimbipa isihiyai iwitatamanitandihapaamaahe nehihande. Ami nehi utaaho Kiraisihopi giwunyaahonihiki ami kandi koai neti nusesipati giwunyaahonihiki ko isihiya usaisi komi maariho numwindihandi sandihihiki apipaahi awaindahande.

⁷Sahi namasawi wuwaninihi Kiraisihopi baiwi taawi giwunyaahohiyihyaatisi kopi giwunyaahohitihandi ndi neti nasamandipamataise, ami sahi piwiha akitiha Autaahaatihopitihaapi windi gimunyaitaatiwo? Ami sandi isihiya usa sangi kasisawaayopo. ⁸Isihiya siya sangi sami amitihagiwinyaahohitihandi nepi wiretepisamahohiyihiya siya kiyai Autaahaatiho sahi komihyaatimatitaatiwi gaasatisihonatausaasihiyhaamaahe. ⁹Sahi kimandapi giwunyaapi sami amitiheti nepi ahiyawise. Yisihandi nehi masihonji konji biretihaneti awaindahandi nipisataise. Isi ami sikireti utaaho nehi naasohisangi ami nehi yahurisangi wapa maipihandi nehi naasaindisangi isihiyai katiwunjisaihi isihiyai amitihagiwinyaahohitihanduni ami kiyaami Kiraisihopi baiwi nga giwunyaahotihanduni noaipati maipitaitaise. ¹⁰Iyataati ami nini saindi gwinyaataayo, Awaisihosi sangi anditisaihonihiki ami nini gwinyaahohirihireti sahi gwinyaitauho. Aiwi sahi nehi sangisi wireti windi gimunyaitauho. Utaaso sami gwinyaahotihandi sami amitihagi neti nasopisasiso so diyaamahore? Nini windi moho ami Awaisihosi soai yaawihandi awaindahandi numwitaise, ko maipihandi kaindahandapo.

¹¹Nisi naisihyaati nisataiwi Kiraisihopi giwunyaahohiyihyaate. Ami ninihiki windi sandi Kiraisihopi giwunyaahohiyihiya Judaahiyaami

kiyohirihireti japepihiriwi kiyaami ambipati namandipapise, ndi piwiha windi ausaataamaayo. Owetise. O ami nini sandi kandi piwiha ausaasanaahi ami ipi titihi atawihati kateti Kiraisiho napwindihandapiha piwiha kiyaami amitiha ami omañititih windi neti namusopisasindaise. Iyati ami isihya ningisi yaasihandi windi namaanimitaapo. Ami ninihi ipi titihi atawihati kateti Kiraisihoai tipimandaapi tiwauhi napwindihandapi piwiha ausaahonihi ami ningi kiya yaasihandi taawi naninyawaayopo. ¹² Siya isiya taawi sangi mwinyaipisatiwi sami amitiha gwinyaahohitihandi nepi nasopisasohiyihya kiya usihyaami ambipati namandipatitaatiwihandapi apipaahi watipitiwimawaayopo. Kiya siyawaayowi ami kiya kiyaami paatonihaisangi napamawaawaahi ami ngaatitaise.

¹³ Ami sahihi nisi naisihyaati nisataiwi Kiraisihopi giwunyaahohiyihyaate, sahi titihi komihyaatimatitaatiwi Autaahaatiho aimi gaatati sangi nasamaasihyaate. Iyati Judaahiyaami winihapipa Mosesiho numwimbipaami watipihandami otitih nehi otipipatihatimatitawi bimaui nuwati nehahaatesamasihyaate. Iyataati ami sandi Autaahaatiho sangi winihapipaami otitihapi nuwati nasamaasitindi sahi sami ambipati maaritirihireti japepihiriwi maipihaiwa kaitaatiwi kasisataamaise. Owetise. Sami ambipati maaritindihandi windi maasinjatane. Sahi isihyai maariho nunyawu kiyai wapa kawiiwi iwitatamanitaatiwihandi sangi jainjatonih ami isihyai maariho nunyawu iwitatamaniwi ususaati maariho namininiwi itamañiniwise. ¹⁴ Autaahaatihomi winihapipa nehi naasaimbaahihi komi Mosesihomihetapi komi isihyai numwimbipa nahataapai namaasati ahondaise. Iyati kapa Autaahaatihomi winihapipa naasaimbaahihi ahotimbipa sandaase. “Kinyi kiwahonji maariho naminihingipatamataimbi isihya usaisi kinyi maariho nunye,” ndaase. ¹⁵ Satisi ami sahi kohasipihoi ainjhipipamataiwi tunniwi ikwinawaawaahi ami sahi baiwi jaawihyaato. Ami wiwa sahi sami syohiwiwara nepi kiyaaatinihi nopisasindaawo.

Autaahaatihomi Itipihouni Isihyaami Ambipatuni Maaritindihandi Naasikandimaaha

¹⁶ Sahi piwaatiwi daiwi bimitaatiwihiretapi nini kimandi kandaato. Sahi Autaahaatihomi Itipihoi jihemapise, ami ko sami piwiha dahopa bimohirihireti jainjatito. Jainjatonih ami sahi ko kasatirihireti daitaatiwo. Ami sahi siyawaawaahi ami sami maariho jahihouni ambipatuni maipihaiwa kaitandi maaritati gwinyaasirihireti sahi windi daiwi bitopi piwaatiwi minjapepihiritaatiwo. ¹⁷ Sahi nasisoaari Autaahaatihomi Itipihoi kasatati nasisirihireti daiwise, ami sahi samaayawaawaahi sahi wapa kapaapi Itipihoi windi maarimitati

kapai tiwandati nemasipipa mwitetiwi kaitaatiwi maaritiwi watipitiwimaitaawo. Iyataati ami sahi gaahapa wapa kaitaatiwi Itipiho maaritimbipauni, ami sami ambipatuni maariho jahiho kasatati nasisihi mwitetiwi kapa kaitaatiwi maaritiwi watipitohitihanduni nepi nepimatinamaise. Iyataati suri tiworihurimatamaise. Sauri saihi ami sahi wapa kaitaatiwi gwinyaapi maaritohipipa windi kamaayopo. ¹⁸Iyataahandi kandi sahi Itipihoai nepi jihemasaihi ko sangi jainjatonihii ami ko kasatirihireti daiwi bitotawaawaahi sahi winihapipaami otitihinehi otipipatihatimaatimatiwi bimindawaayopo.

¹⁹Nyahi aimi mmonaati gwinyaawaahiyaane, isihiyaami ambipati maariho jiho jahiho kaiwaiwa auta noaipa ahotiho. Aiwi ami usihiyauni asihiyauni usa asihiya usihiya kiyaami apwaatiya ami warisaametihiihiyaisawi ambipati naminiwi timaamaitawaayopo. Aiwi apipaahi ainjotati maipihaiwa gwinyaapi kaiwa kaiwi ami mamaawisawiya ambipati ausaimanawaayopo. ²⁰Aiwi ami kiya autaahaatiho jaipitahopi gwinyaapi mepi autaahepumapi gaapundawaayopo. Aiwi kiya isihiya usai onaapipa kawiiwi ami paasinaputarundiwi tiworisaimatiwi isihiya usaapi apowihii kiyaapi itihitiwi manditaiwi tiworisa kiyohirihireti kiyawaayopo. Aiwi ami nepi isihiya usaisawi iwiriwiwi piwihaara pwisipataahamataiwi tunniwi manditiniwi, ami isihiya usa nga bimauihihiyaapi kiyaamatiyaati nyahi noaipawa nga bimitihaawo, tiwi gwinyaapi itihapipa nepi isipi isihiya usaisawi manditiniwi, ami kiya nehi sawanaapi nahataapa gaahapaahihii naitaatiwi apipaahi maaritiwimawaayopo. Aiwi kiya nepi tipitapaatiwi yandihematiwi nehi kiyai kihonji kihonjaapihi ahoyaniwi usai nehahaatemapi, ami kiyaisawi nehi naasikati kaiwi gwinyaahohiyihiyaisawaahihii piwaniwi daayawaayopo. ²¹Aiwi ami kiya usaamihapaapi nyamihapaimatito, tiwi gwinyaapi kiyaami maariho windoti ami waapoho naniwi naharisohiho pihitiwi naniniwi nahariwi konyahitiwi nupwi tipi iwiriwi, ami wapa wapa kimiketihaiwa kiyawaayopo. Aihii wani jiihi timaniti kasatataato ami jihura nini sangisati maasi bindata aimi sangi sasatataato. Isihiya saiwa kiyohiyihiyai Autaahaatiho komi isihiyaisati windi iwinjaati bimimitaise ndo.

²²Iyataati ami Autaahaatihomi Itipiho kiyati ausaimasiwaiwaahi ami saiwa nini aimi katohiwimaiwaamatiyahaiwaamaahe. Owetise. Ami wapa Autaahaatihomi Itipiho neti kiyati ausaimasiwaiwaahi kimireti kimaiwaare: Nyahi isihiyai maariho nunyaati ami maaritaati, ami dowaaati bitotiha timunaati nehi yatihii nyami ambipati maariho ipatisanaati napaisaati bimaawaati, ami dopiramanaati nowa nasamaayaati keti itihimaataati nehi yatihitaati ipatisana bimaawaati, ami isihiya usaisi iwitatamanaati wapa kiyai kawisaati ami nahateweti

titihinga nga napaitarihiyaanimataati nyami naisihiyai namaamawaati, ami nyahi Autaahaatiho maaritati gwinyaasirihireti watipitaati japepihiraati, ²³ami nyahi noaipawa napaisawihyaanitaati isihyaapi biyaati nga maariho gaaho giwunyaawaati, ami nyami maipihaiwa newaati daahi ipihatisaati jatitihahandi saiwaahihi Itipihomi otipipatamihaiwaare. Iyataati saiwa isihya windi kamaiwise tatihapa winihapipa wapa ahimotise. Apipaahi owetise. ²⁴Ami isihya Kiraisihomihyaahi kiyaami maariho jiho jahihomihaiwa kiyaami ambipati maipihaiwa kaitandi maaritati gwinyaasiwaisawai aimi namihauhi, ami kaiwa aimi noaipati utaaho wo aimi napomasihomatendaise. Isi ami kaiwa kiyaami maariho jahihomihaiwa kiyaami maariho amitiha piwiha ami dahopa windi maawinjatataise.

²⁵Ami Autaahaatihomi Itipihoga Gaaho nyangi apipaahi gaahiri wanihireti bimitihaawihiretenyamataise. Isi ami ko nyami piwiha dahopa nyainjatati saiwi daiwi ami piwaatiwi bimaawise, nyatati kanyatonihini ami nyahi ko kanyatirihiri kireti daayaati bitoitihawo. ²⁶Nyahi yawanaanapi windi sataati, 'ningisi sahi ninjasawewise ami nini gaahonini apipaahi awaisihoniniso,' taati kamaataati ami usaisaati newaati maariho nainaamaninaati mandiha aponyati yaasonihini timunaati ami usaamihapaapi nyamihapaatito, taati nyami maariho omanjititihinga windi maanyindone.

Sahi Kiraisihomi Isihyaati Nepi Ususaati Itatamaniniwise

6 ¹Nisi naisihyaati nisatawi Kiraisihopi giwunyaahohiyihyaate. Ami sahi mmonawa samihatihinga sami naisihya Kiraisihopi giwunyaahohiyihyaami wo maipihandi kiyonaahi ami usaati Autaahaatihomi Itipihoga kasatati nasisirihireti daayohiyihyaati bipi yatihinga napaisaati koai nepi titihapumapise. Iyawaawi ami sahi sawanaati nehi ninaasonihinga baiwi jatiniwi jaawihyaati sandi kaiwise, ami wiwa sangisangisi wapa nasisehonihinga kapaapi maipihandi kaiwi wiwa napepaapi timihaitaawo. ²Sahi isihya usa naanjihaiwa nepi bimohiyihiyai anditiwipi kiyaami naanjawiwaiwa sahi kiyaisawini ninawipihinga nepi usaimaniniwi awitimapise. Ami sireti kiyawaawi Kiraisihoga winihapipa katanyisimbipa sahi nepi gaamaitaapo. ³Ami utaaho wo Autaahaatihomi ndihetihinga ambipati awaipati apipaahi owehondaahandi kandi ami ko sawahopi komi maarihoatihapihinga satati, nini awaisihonihinga ambipati awaipatisahonihinga, tati gwinyaataataahi ami so utaaho amitihinga apipaahi oweho naharihore. ⁴Iyataati ami sahi nahatiyaati nehi ninaasonihinga kinyi kiwahonihinga otipipati dahopa kaimbi daimbi bitohingirihireti mmotinipihinga gwinyaape, nga kiyataayono e maipo tipohinga. Ami kinyi otipipati dahopa nga noaipahonaahi ami gaaso, tipihinga kinyi kaingipipaapi maarite. Aimbihinga ami kinyi otipipati dahopa utaahoga womihinga

otipipati dahopa japepinjapi kapaisapi nepi tipitapaapi windi mmonime. Owetane. ⁵Ami sandi nini apaapimaato. Nehi ninaasohi komi kaiwaiwa otipipati ami dahopaami naanjiwaiwa nehi naasohi sawaho nehi koai neti awitimaitande.

⁶Utaaho wo ami utaaho woai Autaahaatihomi piwiha kataunjihhi taati kataunjonihhi atisati nesiho, ami ko ambipatapihapa gaahapa nahataapa ko ahusotati ami isiwatimbipaami wapa koai Autaahaatihomi piwiha kataunjisihoai iwitatamanati anditiwihonihi bimitandihapa nunyane.

⁷Sahi kimandi baiwi gwinyaapise. Autaahaatihu sahi gwinyaapi ami kiyohiwaiwa nahatewa mmonati gwinyaasihi kaiwa komi ndiheti auta ahondaise. Sahi Autaahaatihopi wapa namoasitaapo. Isi ami sahi usaati sami maariho jahihomi gwinyaati maaritirihireti japepihiriwi utaaho wo komi osaataati nandapa isapipa niyaamati yamasipatamataiwi, ami maipihaiwa kiyawaawaahi ami utaaho komi osaataati nandapa yamasipipa titihi kapa kipwipatamataiwi ami maipihaiwa kiyohiwaiwaami wihoanjihandi kipiwi naitaapo, nandapa nawihomataiwo. ⁸Iyataati ami utaaho wo komi ambipati maariho jahiho kaundati nunjirihireti japepahirati daayataataahi, ami maariho jahihomihapa nandapa maipihapa noaipati akuraahiyonihi ami ipotihura ko maipihandi neti nopisasindaise. Iyataati ami ko Autaahaatihomi Itipihho Gaaho gwinyaati maaritirihireti japepahirati utaaho osaataati nandapa gaahapaami isapipa yamasihhi nimaatati ami akuraahaihi nandapa gaahapa ami wapa gaahapa kaisiho, ami ipotihura ko nandapa nimanihohipatamatiyati gaahandi koai Autaahaatihu nunyonihhi neti nga Autaahaatihuaisati biyati jinjapihi jinjapihi konihhi bimitaise. ⁹Isi ami nyahi gaahandihhi kaitihaahandapi windi pohipimaitihaawo. Ami nyahi windi pohipimaayaati nyami ambipati namaanyirapetati nehi nga otipipati kiyahaawaahi ipotihura nandapa apipaahi gaahapa kipwito. ¹⁰Isi ami wura nyahi isihiyai gaahaiwa wiwa kawitihahura noaipahonaahi ami nyahi isihiyai gaahaiwa kawitihawo. Iyaati ami biyaati watipitaati Kiraisihopi nyamataiwi giwunyaahohiyihiyai gaahaiwa kawitihawo, ami kiya Autaahaatihomi manyinya itususasi nususasamataiwihiyaaso.

Porihho Kiraisihomi Isihiyai Piwiha Ipotiha Jatiniwo

Undati Ami Asisiha Gaahuraare Undataase

¹¹Sahi mmoniwise, kima piwiha nini niwahonini nisi ikwiraahi awaiwaiwa jipatipiyataayo, ami sahi satiwi Porihho sawaho komi kairihireti kiyati jipatipiyataise tiwi sahi mmondaatiwi piwiha asitiputi ipotihha sangi kasatataato. ¹²Isihiya siya sahi Judaahiyaami winihapipa japepihiriwi sami ambipati namandipatitaatiwi taawi nasisepaipapi wirapi asipi atipati nasanyohiyihiya siya nehi yamaapi

ambipatetapihaiwa awaiwaiwe tiwi gwinyaapihiyaare. Ami sandi kiya sangi sasatiwi, sami ambipati namandipapise satotimandi, ami kiyaapi Judaahiya maarititaatiwe. Aiwi ami kiya Kiraisiho ipi titihi atawihateti napwindihandapiha piwiha ausaasahi ami kandapi Judaahiya kiyai yaawihandi numwitauhi windi namuwitaatiwi sandi kiyawaayopo. ¹³Isihiya ambipati namandipatohiyihiya winihapipa kiya sawana windi minjapepihiropo. Nehi sahi sami ambipati nepi ahoaapi namandipatitaatiwihandapi gwinyamawaayopo. Ami kiya kandapi sahi kiyaami piwiha atiwiwi sami ambipati nepi ahoaapi namandipatohitihandapi maaritiwi Judaahiyaami ndiheti tihaapaitaatiwo. ¹⁴Ami ninihi sandi siyahandapi windi apipaahi masihonjisangi maarititi tihaapimaito. Nehi windi naasaindihim kimandapaahihi nini nga maarititi tihaapaito. Jisasi Kiraisiho nisi maipihaiwa nenimaitandi ipi titihi atawihateti nimaatati napwindihandapaahihi nini maarititi tihaapaito. Iyataati sandi Kiraisiho napotaati nisi maipihaiwa ningi neti nanopisasitandihaiwa nemasihi, ami maapi yapimbatambihaiwa isihiya nepi kiyaami apohipataatemahohiwaiwa nisi maariho amitihetapi aimi nanipimatati napomase. Iyataati ningisangi kimaapi yapimbatambihaiwaapi windi gimaanunyaatati nanipimatati aimi kaiwaatihapi napomataahonisamatendaayo. ¹⁵Isihiya kiyaami ambipati namandipatiwo e nahomaamandipatiwo ami sandi windi awaindahandimaahe. Owetise. Nehihande. Isihiya kandapi windi waati gimunyaitaapo. Ami windi kandi nehi awaindahandihim isihiyaisi Autaahaatiho japihi neti kiyati wanihiya asiyihiyemasitihandi sandihim apipaahi awaindahande. ¹⁶Isihiya sandihim gwinyaapi nepi isiwatohiyihiyai Autaahaatiho maariho neti yatihiwuwati uripatisati napaisaatumati ami gaahati kiyai kawitandi nini gaapundataayo. Iyataati ami nini nehi kiyaapaahi gaapundataamaayo, Autaahaatihomim isihiya nahatiyaapimaawi gaapundataayo.

¹⁷Ningi jinjihaatemati utaaho wo tiwati miniwati yaasihandi nanimitandi pondise. Isihiya aimi tipi miniwauhi nisi ambipateti yamwipati ahetipati neti ningi siyati nanisataise, nini akitinihi Jisaasihomim otipipatihonine. Iyataati sandi nisi ambipateti yamwipati ahetindimandi utaaho womi nehi otipipatihoi iwinjatisiho kawirihireti nanoaipataise, ami nini Jisaasihomim nehi otipipatihonisamataindahoninim iho.

¹⁸Nisi naisihiyaati nisataiwi Kiraisihomim giwunyaahohiyihiyaate, nini sapi gaapisundataayo nyami Awaisiho nyangi nyainjatisiho Jisasi Kiraisiho sahi nahatiyaatangi gaahati kasitando. Isi ami siri kireti siyati sangi kasisonihim nasoaipane. Akite!